



ATASSUT

UPA 2016/89

Steen Lyngø

26. 05. 2016

Inuiaqatigiinni naligiinnerulernissaq pillugu inuiaqatigiittut naleqartitat suut tunngavigalugit Nunatta ineriartortinnissaanik Inatsisartuni oqallisissiatut siunnersuut.

(Inatsisartunut ilaasortaq Sara Olsvig, Inuit Ataqatigiit)

Atassut-mit apeqquteqaat aallaavigalugu oqallisissiamik siunnersuuteqartoq Sara Olsvig, IA siunnersuuteqarneranut qutsavigissavarput. Oqallisissiaq imartuumik imaqartoq aammalu sivisuumik oqallisigineqarsinnaasoq Atassut-mit ima ilassuteqarfigissavarput.

Inuiaqatigiinni nalingiinneq annerpaaq angussagutsiuk Atassut-mit pingaartitavut malillugit makku aqqaasariaqarput:

- 1) Inuttut ataasiakkaatut assigiinnik pisinnaatitaaffeqarnek aammalu akisussaaffeqarnek
- 2) Ilinniartitaanikkut assigiinnik periafissaqartitaaneq
- 3) Nammaqatigiinneq
- 4) Nunap ineriartortinneranik nalingiinnerusumik aningaasaliisarnek
- 5) Oqartussaaqataarnermi assigiimmik pisinnaatitaaffeqarnek, aamma ikinnerussuteqarluni inissisimagaluarluni

Atassut-mit pingaartitaraarput innuttaasut assigiimmik tunngaviusumik pisinnaatitaaffeqartariaqartut, tassalu inuttut ajornartoorfinni pisariaqartitsiffinnilu isumassorneqarsinnanermik pisinnaatitaaffeqarnissaq.

Assigiimmik akisussaaffeqarnissaq aamma inuiaqatigiinni pingaartitat ilagisariaqaraat Atassut-mit pingaartitaraarput. Assersuutigalugu taaneqarsinnaavoq nunatsinni ukiuni makkunani ilinniagaqarnissamik nunatta annertuumik pisariaqartitsinera tunngavigalugu aaqqiissuteqartariaqarpugut. Innuttaasutut ilinniarnissaq aammalu ilinniaqqinnissaq innuttaasumut pilerinartuunissaa tunngavigalugu aaqqiisariaqarpugut.

Atassut-mit taamaammat pingaartitaraarput innuttaasut akileraartarnikkut assigiimmik akisussaaffeqarnissaat. Taamaangippammi innuttaasut ilinniarnissaminnut imaluunniit ilinniaqqinnissaminnut kajumissuseqarnissaat annikillisinneqassammat. Ilinniagaqarnek imminut akilersinnaasariaqarpoq.

Atassut-mit pingaartitaraarput inuiaqatigiit sumiiffinni assigiinngitsuni tunngaviusumik assigiissumik atugaqarnissaat aallaaviusariaqartoq. Assersuutigalugu taaneqarsinnaavoq naammaqatigiinneq ullumikkut anguneqartarpoq, innuttaasut pisortanit kiffartuussissutinik atuinermi akiliisarnerat tunngaviatigut

nammaqatigiinnermik aallaaveqarmat. Aap ilumoorpoq sumiiffinni assigiinngitsuni akit ullumikkut assigiinnginnerat atuuppoq, kisianni nalimmassaanerit atuussimangitsuuppata assigiinnginneq suli annertunerusoq atuussimassagaluartoq tamatta ilisimavarput.

Inuiaqatigiit assigiinnerusumik atugassaqaarnissaq ilaatigut makkunani atuuppoq: Kallerup inneranik atuinermi, imermik atuinermi, assartuussinerni aammalu angallannermi akigitinneqartuni nalimmassaaneq atuutsinneqarpoq.

Atassut-mi minnerunngitsumik pingaartitaraarput inuiaqatigiit nalingiinnerusumik ineriartornissaat. Sanaartornikkut allatullu inuiaqatigiinnit aningaasaliinerit sumiiffinni assigiinngitsuni assigiinnerusumik ineriartormik siunertaqaarnissaat Atassut-mit aqquataasariaqartoq nalilerparput.

Oqartussaaqataanermi inuiaqatigiit assigiimmik pisinnaatitaaffeqarnissaq aammalu akisussaaffeqarnissaat tunngaviusariaqarpoq. Atassut-mi pingaartitaraarput inuit ataasiakkaat suminggaanneernerat, suaassutsimikkut suunerat, oqaatsimikkut, aaliangersimasumik upperisaqarnerat allatullu pingaartitamikkut aaliangersimasumik inissisimanerat apeqquataatinnagu tusarneqartarnissaat aammalu inissaqartinneqarnissaat. Inissaqartitsineq ataqqinninnerlu tunngavigalugu inuiaqatigiit ingerlanneqarnissaat Atassut-mit pingaartitaraarput.

Innuttaasut ataasiakkaat kiffaanngisseneqarnissaat Atassut-mit pingaartitaraarput. Kiffaanngissuserli akisussaaffeqarnermik tunngaveqartariaqarpoq. Taamatut tunngaveqaraanni inuiaqatigiittut ineriartornissaq qulakkeerneqassammat.

Taamatut oqaaseqarluta, Atassut-mit Inatsisartut oqaaseqaatissaattut siunnersuut taperserlugu matumuuna nalunaarutigissavarput

qujanaq